



Sa sche This Jenny (pps/GL) vegn da persvader Martin Schmid (pld/GR)? Puncto taglia pauschala vegnan els strusch ad avair differenzas.

FOTOS KEYSTONE

# Taglia pauschala cun elements obscurs u gronds fauturs

Debatta davart l'iniziativa cunter l'imposiziun tenor expensas

■ (vi/anr) La chombra pitschna vul vivanant lubir privilegis da taglia per esters ritgs. Ella recumonda da refusar l'iniziativa cunter la taglia pauschala. Ins tema che tscherts chantuns perdessan bels imports sch'ils privilegiads bandunan la Svizra. Igl è puspè ina giada stà ina debatta classica tranter l'ala burgaisa e la sanestra. Ils burgais han reclamà ier ch'i saja da resguardar il federalissem e la suveranità fiscal dals chantuns. Ils votums sanesters èn sa concentrads sin la giustia fiscal. A la fin ha il cussegl dals chantuns votà cun 30 cunter 9 vuschs e 3 abstenziuns cunter l'iniziativa che vul abolir la taglia pauschala.

## «Elements obscurs»

La populaziun haja en general confidenza en sias autoritads ed ina buna moralità da taglia, ha ditg Christian Levrat (ps/FR). L'imposiziun tenor expensas – sco la taglia pauschala sa numna uffizialmain – obtegnia dentant elements obscurs e «pateschian d'ina assenza totala da trasparenza». Questa taglia sutminechia la confidenza da la populaziun. Plinavant haja l'exempel da Turitg mussà che l'aboliziun da questa taglia portia strusch sperditas. Las villas dals privilegiads che hajan bandunà il chantun vegnian uss abitate dad auters ritgs che pagan taglias regularas.

La taglia pauschala cunterfetschia a la costituziun, ha reclamà Robert Zanetti (ps/SO). En il mender cas giessan a perder tar in «gea» a l'iniziativa entradas da 695 milliuns. En vista a las entradas totalas da 150 milliardas na cumportia la taglia pauschala pia gnanca in mez procent. «Valan quests pèr mareghins la paina da periclar la giustia da taglia e da violar ils principis da la costituziun?»

## "Gronds fauturs"

Raphaël Comte (pld/NE) ha avertì ch'i crudass era davent investiziuns en immobiglias e piazzas da lavur sch'ils esters ritgs van davent. Bliers d'els sajan era gronds fauturs da la cultura. La Svizra sa chattia en concorrenza internaziunala sin champ fiscal. I fiss «masochissem fiscal» da laschar crudar la taglia pauschala.

Sch'intgins chantuns hajan abolì questa taglia duaian ins betg sfurzar tuts chantuns tar quest pas, ha ditg Martin Schmid (pld/GR). A Turitg hajan ins forsa pudì occupar ils domicils dals pauschalisads cun auters ritgs. Quai na funcziunia betg dapertut. «En il Grischun na prenda nagin ester davent il domicili ad in Svizzer.»

Ils 268 pauschalisads dal Grischun pagan 50 milliuns al fiscus. Il chantun genereschia per chau e persuna uschi-

glio mo pauc taglia cumpareglia per exempel cun Sviz u Basilea. Ils chantuns da muntogna saja avisads sin la taglia pauschala. Plinavant profiteschia la AVS damai ch'ils pauschalisads sburseschian grondas summas a l'assicuranza da vegls.

## Widmer cunterdi a Schmid

En ils dus ultims puncts ha cussegliera federala Eveline Widmer-Schlumpf cuntradiu a Schmid. 70 pertschient dals pauschalisads sajan pensiunads e retirian renta. Plinavant na saja la pauschalisaziun fiscal betg in fenomen muntagnard «nun ch'ins considereschia il Vad e Genevra sco regiun periferica da muntogna». En il Vad dettia quai 1396 pauschalisads, a Genevra 710, en il Vallais 1300 ed en il Tessin 877. Pir suenter vegnian las regiuns da muntogna: il Grischun cun 268 e Berna cun 211 pauschalisads. «Igl è pia ina dumonda naziunala.»

Ins ditgia cun tutta raschun che questa dumonda saja sin pasentia areguard la costituziunalità. La taglia pauschala possedia dentant ina clera basa legala ed ins stoppia pasentar giu l'interess public. A la fin dals quintes giustifitgeschia il niz la limitaziun costituziunala.

Sco proxim tracta il cussegl naziunal l'iniziativa. Suenter ha il pievel da decider davart la taglia pauschala.

## ■ PUNTG DA VISTA

### La taglia pauschala demoralisescha

CLAUDIA CADRUVI / ANR

Ier han ils politichers burgais en la chombra pitschna calculà tge sperditas che chantun, confederaziun e vischnancas ston prender en cumpra sch'il pievel accepta l'iniziativa cunter la taglia pauschala. En il mender cas giessan a perder entradas da var 700 milliuns l'onn.

Defendì l'iniziativa han mo pauc cussegliers. Quels ch'èn s'annunziads a pled han argumentà cun la giustia: Tgi che ha blier, duai era pajar blier. In aspect impurtant n'han ins dentant betg tratg a strada. Igl è in aspect psicologic che chaschuna probabel sperditas da milliardas.

Tge pensa il pajataglia pitschen sch'el sa ch'il ritg da l'exteriur sto sbursar al fiscus sulet ina cagna cumpareglia cun sia entrada efectiva? Tge resenta il pajataglia normal, che sto rembursar al fiscus in tschintgavel da sia pajaglia, sch'il bainstant en sia villa da luxus sto dar giu gnanc ina dieschma?

Il pitschen pajataglia pensa che l'equai saja immens malgist. E co reagescha el? El emprova – tenor l'exempel dals ritgs – dad «optimar» sia taglia. Per in pajataglia normal n'è quai betg simpel. Sias entradas figureschan gea sin il cedel da paja.

Tuttina datti pussaivladads. Tschientmillis da pajataglias han anc in'entrada laterala: Il scolast da musica dat per exempel anc intginas lecziuns privatas. La nettegiunza na schubregia betg mo tar ses patrun, mabain anc tar la vischina. Il contabilist liquidescha la fin d'emna anc ils quintes per in'otra interpresa.

L'entrada ord in tal job lateral sto tenor lescha era figurar sin la decleraziun da taglia. Ma tge pajataglia normal è anc pront da declerar undraivlamain mintga rap sch'els pli bainstants mitschan cun ina magra pauschala?

La taglia pauschala demoralisescha il pajataglia normal. E sche tschientmillis pajataglias demoralisads na decleran betg pli undraivlamain tuttas entradas effectivas perdan chantuns, confederaziun e vischnancas a lunga vista dapli entradas da taglia che quai ch'els gudognan cun la taglia pauschala. Plinavant va a smerscha in bain fitg custaiavel: La confidenza tranter autoritads e burgais.



En las villas da luxus a Turitg ch'ils pauschalisads han bandunà vivan oz ritgs che pagan taglia regulara.